

Evelyn Wever-Croes (MEP)

Durante congreso 2015 MEP a presenta su plan pa rescata nos pais



ORANJESTAD – Congreso 2015 di MEP dia 27 di september ultimo a marca tambe comienso di campaña electoral 2017 pa partido MEP. Lider di MEP Evelyn Wever-Croes a presenta e plan di campaña cual lo sirbi como programa di partido y di gobernacion.

Cu esaki partido MEP ta e prome cu a lansa su ideanan ki pasonan mester tuma pa rescata nos pais. Esaki a cay den masha bon tera cerca tur esunnan presente. “E trabou lo no bay ta facil pa rescata nos pais. Nos ta hopi leu di yega na unda nos tabata na 2009, pero ni con duro y



dificil e por mostra, awe mi ta sinti mi firme y mi ta sinti mi inspira pasobra mi sa cu tin un pueblo mi tras cu ta respalda mi y mi sa cu boso hamas lo laga Aruba un banda.

Nos tin cu sigui padilanti y cu positivismo cu nos ta bay logra. Sigui padilanti te ora cada Arubiano tin un bida digno atrobe. Esey ta e tema central di nos partido. Nos a cay atras ultimo 6 añanan, nos a perde nos autonomia financiero y nos a perde nos estabilidad economico y awor ta e momento pa recobra nos libertad, nos prosperidad, nos seguridad y nos dignidad.

Pa nos recobra esaki nos mester enfoca riba dos area importante: e area financiero y e area di integridad. Esakinan ta e dos pilarnan riba cual nos ta bay construi e bienestar pa nos pueblo”, lider di MEP a duna di conoce.

Sanea financia di pais Aruba

Evelyn Wever-Croes a duna algun ehempel: Baha di 9 pa 7 minister y baha cantidad di coordinadornan. Para biahenan y gastonan innecesario y di luho di gobernantenan. Para tur contracto y proyectonan cu no tin prioridad. Elimina tur e diferente fondonan, manera fondo di turismo y incorpora nan bek den presupuesto di pais Aruba. Refinancia y restructura e debe nacional cu un plan di rescate pa por haya interes abou, y e prome ley cu mester elimina ta e ley di CAFT! Supervision lo bin bek den man di nos propio institutonan manera Raad van Advies y Algemene Rekenkamer.

Recobra integridad den gobernacion

Pa esaki tambe Evelyn Wever-Croes a duna algun ehempel: introduci leynan drechi

di screenmento di politico, Ley pa regula financiamiento di partidonan politico, Control estricto riba integridad di gobernantenan y un ministerio publico cu ta investiga gobernantenan sin miedo y sin lubida, cambia e Ley di votacion pa caba cu e wegá di ‘stoelendans’ cu hendenan ta horta asiento y bay cu nan.

“Esakinan ta e dos pilarnan riba cual nos ta bay construi un Aruba miho, y bienestar pa tur. Mescos cu despues di cualkier tempestad solo ta sali, asina tambe solo ta sali despues di e tempestad di gabinete Mike Eman. E ora solo lo sali bek pa nos muchanan, pa nan por haya enseñansa riba bon nivel, y cu nan diplomanan ta wordo reconoci den exterior; pa nos hobennan tin oportunidad di recreacion sano, y oportunidad di empleo; pa nos mamanan soltera haya sosten necesario pa nan hiha nan famia padilanti; pa nos famianan y pa fortifica e nucleo familiar, y solo ta sali tambe pa nos grandinan pa nan haya e cuido digno cu nan merece”, tabata palabranan di lider di MEP, Evelyn Wever-Croes durante Congreso di MEP 2015. Mester remarca cu durante su discurso el a duna hopi solucionnan concreto pa e problemanan mas serio di nos pais, mustrandó asina cu MEP ta cla pa enfrenta cualkier reto nos dilanti. Y pa esaki el a haya sosten total di Congreso 2015. □